

Uunga siunnersuut: Suliffeqarnermi innersuussisarneq il.il. pillugit Inatsisartut inatsisaata allannguuteqartinneqarnera pillugu Inatsisartut inatsisaat nr. xx yy 2015-imeersoq

(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq)

Saqqummiussissut

(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq)

Siullermeerneqarnera

Siunnersuummi siunertaavoq Kalaallit Nunaanni suliffeqarnermi annertunerusumik nuttarsinnaalersitsinissaq, aammalu avataaneersunik sulisussanik tikisitsinissamik pisariaqartitsinerup annikillisinneqarnissaa.

Inatsimmi arlalinnik allannguuteqartitsisoqarpoq, nuttarnersitsinissamut ikiorsiissutinik atuinerulersitsisussanik.

Illoqarfinit allaneersunut piukkunnassuseqartunut nuttarnersitsinissamut ikiorsiissutinik itigartitsisariaqartarneq kommunit misigisarpaat. Tamanna ilaatigut pisinnaasarpoq illoqarfimmi pineqartumi suliffissaaleqisoqarpat suliassanut pisariaqartunik piukkunnaatilinnik, kisianni pineqartup atorfimmik paarsisinnaanissaanut ajornakusuulersitsisunik unammilligassaqarpat.

Taamaattumik sulisitsisut nunarput tamakkerlugu sulisussarsiorsinnaalernissaat, aammalu najukkami pissarsiorinissamut killeqartinneqannginnissaat, maleruagassaliorfigineqarpoq. Taamaaliornikkut sulisitsisut sulisussanik avataaneersunik pissarsiortarnerminnut taarsiullugu, nunatsinni suliffeqarnermi tamarmi ujartuisinnaalernissaanut periarfissiisoqassaaq.

Kiisalu suliffissarsiortoq illoqarfimmi nutaami nuuffigisassamini nammineerluni inissarsisimappat, nuttarnersitsinissamut ikiorsiissuteqarnissamut periarfissiisoqarpoq. Taamaalilluni erseqqissaasoqarpoq, suliffissarsiortoq inissaqartinneqarsimasinnaasoq aammalu inissiaq suliffissarsiortup nammineerluni nassaarisimasinnaassagaa.

Ilanngullugu aalajangersakkamik pilersitsisoqarpoq atorfininnissamut qinnuteqartunik oqaloqateqarnernut aamma suliffimmi misiliinernut atatillugu tapiissuteqartoqarsinnaanngorlugu. Nunatsinni suliffeqarnermi annertunerusumik ineriartortoqarnissaanut aammalu piukkunnassuseqarnerit kissaatigisallu imminnut tulluarnersut aalajangernissaanut suliffissarsiortut sulisitsisullu pitsaanerusunik periarfissinniarlugit, aalajangersagaq taanna ilanngunneqarpoq.

Taamatut oqaaseqarlunga siunnersuut Inatsisartuni suliassanngortippara.